



Jahresbericht 2013

Scho wieder isch es Jahr verby. E bsundrige Höhepunkt isch im verfllossene Jahr für ds Trachtehörli der Bsuech vom Zentralschwizerische Jodlerfescht z Reiden (LU) gsy es isch ds erschte mau das mir amene ander Unterverbandsjodlerfescht hei teilgno.

Der nennenswärt Höhepunkt für Tanzgruppe isch ds Tanzfescht z Chur gsy. Unter der Leitig vom Hanny Burri isch ds Trachtehörli 51 mau zämme cho, da dervo sy 9 Ufritte u ds Expertiesesinge z Riggisberg gsy.

Tanzgruppe het unger der Leitig vom Vreni Wiedmer u der Brigitta Grünig 36 Probe gha u isch 6 mau öffentlech ufträtte. Zämme hei mir d HV ds Trachte Zmorge, ds Jantarkonzärt d Ungerhautigsabende d Alterswiehnachte u e Fototermin düregfüehrt.

Der Vorstand het a 5 Vorstandssitzige Gschäft vom Verein behandelt.

Wiu sy ds Lokau im Gwatt zu dere Zyt grad umboue hei. Isch ds Trachtetanzkurs Wochenändi vom 12.+13. Jänner ds erschte mau z Lyss düregfüert worde. A däm Alass teilgnoh hei fuf Froue vor Tanzgruppe. Aui sy begeisteret vo de Lokalitäte u vom Ässe gsy.

Mit dä Singüebige hei mir am 15. Jänner aagfange früsch glöiet hei mir üs a ds üebe u ds Lehre vo üsne Lieder gmacht.

Die ershti Tanzüebig im 2013 isch am 21. Jänner gsy. Jedes Jahr fröie mir üs uf dä Tag wo mir üs aui wieder dörfe gseh u mir sy geng vouer Elan für öbis nöis ds Lehre.

Wäge de Bekannte Problem mitem Wirt vom Restaurant Chrüz het d Houptversammlig sid 58 Jahr ds erschte mau nid z Gurzele chöne düregfüert wärde.

Nach de Vorkommiss a der Houptversammlig vom 2012 het der Vorstand d Ufgab gha e Alternative ds sueche. Mir hei im Kirchlichebegägnigszäntrum z Seftige ds Ideale Lokal gfunge.

Ou für ds Ässe nach der HV hei mir üs öbis müesse la yfaue, mir hei üs im Vorstand fürne Fleisch- u Käsplatte entschide. Ds Getränk hei mir i der Landi bsorget. Es isch e sehre gueti Alternative gsy, es het ou nume positi Feedbacks gäh.

Leider hets a der Hoputversammlig wo am Frytig der 25. Jänner isch düregfüert worde nid weniger aus vier Ustritte ds behandle gäh.

D Daniela Hadorn-Thierstein, d Monika Schober, u ds Heidi Hodler us der Tanzgruppe, so wie us em Trachtehörli ds Vroni Brönnimann hei Schriftlich der Ustritt bekannt gäh.

Zum Glück hets ou öbis gfröits gäh, mir hei Barbara Zehnder aus nöis Mitglied vom Trachtehörli dörfe i Trachtegruppe ufnäh.

Die Abträttendi Kassierin Agnes Zenger het üs e Jahresrächnig mitemen positive Ergäbniss chöne präsentiere d Jahresrächnig het mitemen schöne Gwinn abgeschlosse.

Im Traktandum Verschidenes ha iig mündlich mi Rücktritt aus Presidänt uf d Houptversammlig von 2014 bekannt gäh.

D Veteraneehrig vom BKJV isch am Samschtig der 2. Horner z Thun düregfüert worde, mir vom Trachtehörli hei nid teilgnoh.

Am Sunntig, 3. Horner het ou z Thun d Delegierteversammlig vom BKJV statt gfunde. Vom Trachtehörli ha iig, der Markus u d Rosmarie Schneider, d Christine Reinhard, u ds Hanny Burri teilgnoh.

Die wichtigschte Traktandum sy d Wahl vomne nöie Presidänt so wie d Ersatzwahi y Vorstand gsy.

Aus nöie Presidänt isch Eistimmig u mit grossem Applous der Stephan Haldimann gwählt worde. Als Ersatzmitglied y Vorstand isch der Hans-Peter Minnig us Thun gwählt worde.

Am Sunntig der 24. Horner sy mir de Betagte u Autelüt vom Pflege- u Autersheim z Wattenwil mit üsne Lieder u Tänz ga e Fröid mache.

A der Vereinsdelegierteversammlig wo am Mäntig der 4. März im Chrüz z Gurzele isch abghaute worde ha iig u d Marianne Reust teilgno.

Nachem abhandle vom Terminkaländer isch ungerangerem vom Markus Kislig der Atrag gstellt worde abdsklääre obs äch müglich wär im Dorfsaal e Beamer ds installiere. Dä Atrag wird mit de Gmeindsbehörde besproche u es wärde eventuelli Offertene igholt.

O im verfllossene Jahr sy mir am Donnschtig der 7. März y ds Playoff Gwatt gah Bowling spiele, es isch wie immer e schöne u Hietere Abe gsy leider hei nid so viel teilgnoh.

A der EJV Delegierteversammlig vom Samschtig der 9. März z Saas Fee het vom Trachtehörli d Anna Rosa Blatti teilgnoh.

Am Frytig der 15. März hei der Walter Fahrni u iig a der Delegierteversammlig vor Gürbetalerjodlervereinigung z Oberbalm teilgno. Ungerem nöie Presidänt Samuel Trachsel sy die ordentliche Gschäft abghandelt worde. Delegierteversammlig Region Mittelland het das Jahr am 22. März z Bälp stattgfunge. Dert isch Silvia derby gsy. Bi eim Thema vo däm Abe, isches ums schwizerische Voukstanzfescht z Chur gange.

Der scho Traditionell Trachte Zmorge isch am Sunntig der 24. März düregfüert worde. Der Trachte Zmorge isch guet bsuecht gsy u mir sy mit der Bsuecherzahl meh aus ds friede gsy. Für die Musikalisch Ungerhautig het d Annarös mit de Blattheidörgeler u ds Trachtehörli gsorget.

Ä grosse Alass für üsi Tanzgruppe isch am 5. Apriu gsy, de denn hei mir ds Regionauträffe düregfüert. Da chöme jewius aui Tanzgruppe vor Region Gürbetau u vom Längebärg. D Trachtetänz begleitet het Ländlerkapälle

Ulmizbärg. Zum Znüni hets viu schöni u gueti Turte, Cake u Sändwitches gäh, wo mir aui säuber hei bache.

Der Adolf Fuess u der Beat Schneider hei a däm Aabe no are Frou bi Rägewätter müesse Rad wächsle wiu sy amne Randstei der Pneu vo Ihrem Outo ufgschlitzt het.

Merci aune dene wo so fliessig bache hei, dene aune wo üs ghoufe hei dä Abe düredsfüere u natürlech Merci viu mau dir Vreni Wiedmer für üs dürs Programm ds führe.

Am Samstag der 6. Apriu hei mir am Konzärt vor Blaskapäue Jantar d Festwirtschaft gfüert, das git geng a Zuestupf für d Vereinskasse. Iig möcht aune wo fürs guete gling a däm Alass öbis bitreit hei ganz Härzlich danke.

Am Samschtig der 4. Meie het sich ds Trachtehörli ds Seftige im KBZ zümne Jodlersamschtig troffe. Am Morge het üs der Roland Finsterwalder e Stimmerabeut, vieu gueti Tips für d Stimm a ds werme chöne gäh mit vielne praktische Übige het jedes gspürt wo siner Gränze liege u wie wit d Stimmspektrum vo jedem Einzelne bi richtigem Isinge cha sy.

Nachem gmeinsame Mittagässe im Cafe Piccolo het der Ueli Zahnd mit üs am Wettlied gschaffet es het no einigi Details gä ds verbessere. Aber im grosse u ganze isch üses Wettlied uf guete Wäg gsy.

Dä Alass isch sehr Intressant gsy u jedes het sicher öbis glehrt u öbis chöne mit Hei näh.

A dere Stell möchte iigs nid ungerlah am Hanny fürs organisiere u der Kirchgemeind fürs benütze vo der Rümlichkeite ganz härzlich ds danke.

Zur Vorbereitig vom Jodlerfest het ds Trachtehörli am Frytig der 10. Meie am Expertisesinge z Riggisbärg teilgnoh. Es isch e guete Uftritt gsy u es het vo de Experte nid vieu zum Ustsetze gää, aber es paar chline Sache hei mir no müesse üebe u verbessere.

O i däm Jahr hets am 25. Meie im Casino z Bärn ä festliche Tanzabe gää. Da aber a däm Aabe z Bärn der Grossalass „Tanz dich frei“ isch düregfüert worde hei mir üs us Siecherheitsgründ entschiede, dass mir a däm Aabe nid teilnäh.

Am 15.+16. Juni isch ds Schwyzerische Voukstanzfescht z Chur düregfüert worde. Uf das Fescht hei mir üs scho lang gfröit. Vo Uettlige us sy mir gmeinsam mit angerne Trachtegruppe Richtig Passugg wo üsi Ungerkunft isch gsy gfare. Dr letscht Bitz vo üsere Reis isch immer Kurviger worde, so das der Car eifach nüm isch wyter cho. Da isch üs nüt angersch übrig bliebe aus üses Köfferli ds näh u ds Fuss, wohuverstange i de Tanzschuh dr Wuad düruf ds loufe. Wo mir du düregschwitzt bi üsere Unterkunft sy acho hei mir üses sächser Zimmer bezoge. Nähr isches grad sofort mitem Car Richtig Chur a ds Tanzfescht gange. Dert sy viu Tänz vom Isige Bestand tanzet worde. Dr ganz Tag isches so heiss gsy, dass mir sogar d Füess im Brunne hei müesse ga abchuele. Grosses Glück a däm Wu-cheänd het Kathrin Peter gah. Bimne Fäutritt het si sich der Fuess verstucht.

si het nächhär dr Samariterposte ufgsuecht. Dert isch si bir Lagerig abem Bank geheit, so dass si nähär nid nume am Fuess het Schmärze gha. Wo mir spät am Aabe du äntlech üsi Bushautesteu hei gfunge, hei mir no sehr lang ufe Bus müesse warte. Zum Dessert hei mir du der letscht Bitz ume düre fischer Waud uf müesse loufe. Mir sy auso scho froh gsy, hei mir ä Taschelampe derby gha.

D Silvia isch y dere Nacht nid so zur Rue cho, da grad beidi näbe ihre hei gschnarchlet.

Ou am Sunntig hei mir wieder viu dörfe Erläbe, Lache u Tanze.

So isches wunderschöns Wucheändi ds Änd gange.

Vom 21. bis 23. Juni het z Reiden ds Zentralschwizerische Jodlerfest stattgufunde mir vom Trachtehörli Gurzele hei üs ou Agmäudet u hei teilgno.

Ds erschte mau i der Vereinsgschicht het ds Trachtehörli Gurzele amne andere Unterverbands Jodlerfescht mitgmacht.

Scho am Frytignamittag hei sich es paari vo üs ufe Wäg nach Reide gmacht. Wiu sich der Thömu üse Chauffeur Treu a d Agabe u d Routewahl vo sim Navi ghalte het hei mir haut statt ca. 5/4 Stund dopplet so lang gha. Sys Navi het nämlich der Stou wo ufe der Outobahn isch gsy wöue umfahre u het üs y nächscht Stou iche gfuehrt.

Nach däm mir im Hotäu Rabe z Zoffige acho sy u üser Zimmer bezoge hei sy mir y ds 6 km entfernte Reide a ds Jodlerfescht gfare u es isch scho veiechlei öbis los gsy. Nach däm mir y der Katholischechilche no es paar Vorträg glost hei u will am nächste Tag üse Vortrag isch ufem Programm gschtande hei mir üs nach es paarne Gmüetliche Stunde im Jodlerdörfli ufe Wäg nach Zoffige em Hotäu zue gmacht. Mir hei gmeint es heig de e Shuttlebus wo uf Zoffige fahri, doch leider hei mir vergäbe bi der Hautstell uf dä Bus gwartet. Nach däm üs das Warte langsam verleidet isch hei mir aus probiert um äntlich y ds Hotäu ds cho, mir hei sogar versuecht Outos uf ds ha, aber die Luzärner hei mit us kei Erbarme gha u hei üs nid wölle mitnäh. Uf d Frage vomne Outofahrer was mir eigentlich hie im Luzänische machi het der Thömu scho chlei Frustriert zur Antwort gäh. Mir mache hie Sozialhieuf.

Ds letscht ischis nüt anders übrigbliebe aus es Taxi ds organisiere wonis nach Zoffige gfuehrt het. U so isch e schöne u Gmüetliche erschte Tag vom Jodlerfescht ds Änd gange.

Jetzt ischer da gsy der Tag wo ds Trachtehörli scho sid Wuche drufhäre güebt u gschaffet het, nachdäm das aui am Samschtmorge der 22. Juni guet u wohlbehalte z Reide sy acho hei mir mit grosser spannig em Aabe entgäge gluegt, de kurz nach de Sächse genau gseit 18.08 hei mir üses Lied „Mach z`Beschte drus“ vom Ueli Zahnd y der guet Bsetzte Johannerhalle z Reide vorde Jurymitglieder chöne zum Beschte gäh.

U wieme später het gseh isch üse Vortrag sehr guet a cho. Ou üsne Düt-sche Fans wo üs scho der ganz Tag begleitet hei u so öbis wienes Jodlerfescht vermuetlich no nie Erläbt hei, het üses Lied chöne begeischtere.

Nach üsem Vortrag hei mir im Landgasthof Schwane z Reide gmeinsam ds Nachtgässe u sy gmüetlich no chlei zämme ghoket es het sicher ou no vieu über üse Vortrag ds diskutiere gäh, es isch ou vieu gsunge worde.

Nach däm mir ds Gscheh u die gueti Stimmig im Jodlerdörfli no e chlei gnosse hei isch für die einte oder die andere Zyt ou scho wieder da gsy für sich uf Heiwäg ds mache. Ou für üs wo ds Reide blibe sy isch irgendeinisch Zyt cho für ge ds schlafe.

U es isch e Idrückliche u e Erläbnissriche Tag ds Änd gange. Wo sicher bi de meischte no lang wird y schöner Erinnerig blibe.

Nachemne usgibe Morgenässe isch für die wo ds rächte Zyt hei uf möge am Sunntigmorge der Festakt ufem Programm gschtande. Dä isch anders Abglofe aus dä wo mir vo de Bärnischkantonale oder Eidgenössische Jodlerfescht här kenne.

Natürlich hei mir ou gspannt uf d Klassierigslische gwartet das isch immer so e spezielle Momänt, mir hei doch wölle wüsse was mir für ne Klassierig erreicht hei aber die heisech Zyt glah bis sy die Klassierigslische use gäh hei.

U glich het me uf einisch die erschte mit de heissbegährte Klassierigslische gseh. U wie isch du ersch üsi Fröid gsy wo mir gseh hei das mir für üse Vortrag Klass 1 übercho hei. Die Klassierig isch e grosse Verdienscht vo üser Dirigäntin. U drum möchte igs nid unterlah dir Hanny no eineisch ganz hätzlich für dini mängisch nid eifachi Arbeit ds Danke mir sy froh u stolz e so e gueti u kompetänti Dirigäntin wi di dörfe ds ha iig hoffe das du üs no lang Treu blibsch.

Ig möchte o de Jodlerinne u Öich aune für Öie gross Isatz danke, de für dä Erfolg ds erreiche bruchts aui.

Nach däm mir am Sunntignamittag no der Umzug gluegt hei isch ou für üs ds Zentralschwyzerische Jodlerfescht ds Änd gange u mir hei üs ufe Heiwäg gmacht.

Am Sunntigaabe hei mir üse Erfolg z Seftige im Höfli bime feine Nachtässe umne Gmüetliche zämme sy no chlei gfiiret.

I danke mir hei aus Bärnergascht u BKJV Vertreter am Zentralschwyzerische Jodlerfescht e sehr gueti Visitecharte abgäh u hei e guete Idruck hinger lah.

I danke das teilnahm a däm Jodlerfescht für ds Trachtehörli Gurzele e nöi Erfahrig u es schöns Erläbniss isch gsy.

Wie jedes Jahr hei mir am 29. Juni y der Chüeweid üses Brätle düregfüert, es isch schön u gmüetlich zue u här gange. Natürlich hei ou üser Musikante mit Ihrne Örgeli viel derzue bi treit.

Vom 30. Juni bis 11. Ougschte het d Tanzgruppe u ds Trachtehörli het bis am 13. Ougschte Ferie gmacht.

Wiu üsi Dirigäntin am Mittwoch der 3. Septämber isch abwäsend gsy u mir d Prob vor de bevorstehende Ufritte nid hei wölle la usfaue het aus Ersatz d Silvia Wenger d Leitig für dä Aabe überno.

Am Samschtig der 7. Septämber hei mir am Jubiläum vom Kirchliche Begägnigszäntrum (KBZ) z Seftige dörfe ufträtte, leider het dert nume ds Trachtehörli chöne teilnäh.

U scho am nächschte Tag het ds Chörli der nächscht Uftritt gah am Sunntig der 8 Septämber isch z Gerzesee ds aujährliche Gürbetaler Jodlerträfte düregfüert worde ds Chörli het d Lieder „Bim Vernachte“ und „Us Fröid“ gsunge.

Üsi 1-Tägegi Vereinsreis isch am Samschtig der 21. Septämber ufem Programm gstande, mitemene Car vo der Firma Engeloeh in Riggisbärg isches gägem Baselland zue gange.

Bi herrlichem Spätsummer Wätter isch üsi Reis Richtig Balstal gange wo mir im Resturant Chrüz der Kaffihaut gmacht hei.

Vo dert gits no öbis Luschtigs ds Verzelle schinbar hets es paar Froue gäh wo statt uf d Toilette i Schaft iche hei wölle ga bisle will si d Toiletttüre mit der Schafttüre verwächslet hei.

Nachemne feine Kaffi u Gipfeli isches Richtig Reigoldswil wyter gange, vo dert sy mir mit der Bärgbahn nach Wasserfallen gfahre.

Es het dert obe verschiedeneni Wandermöglichkeit gäh.

Die einte hei ds Pick-Nick mit gno u die andere hei ds Ässe im Restaurant vorzoge.

Nach es paarne Gmütliche Stunde uf Wasserfallen isches ou scho wieder sowyt gsy u mir hei üs müesse ufe Wäg y ds Tal mache.

Es paar muetegi hei bir Bärgstation es Trotinet gmietet u hei sich mit däm ufe Wäg abe nach Reingoldswil gmacht, es isch e schöni u Idrücklechi Tal-fahrt worde der Wäg isch guet gsy und es isch fasch aues däre Waud gange.

Wo mir unge sy acho isch ou üs Car scho parat gschtande u üsi Reis het chöne wyter gah. Vo Reigoldswil sy mir em Stedtli Loufe zu gfahre wo mir der nächscht Haut gmacht hei. Zmits y der Stadt Loufe hei mir de Lüt wo dert umeflaniert sy mit es paarne Lieder ungerhante. Leider isches für üs säuber nid so eifach gsy es Beizli ds finde wo mir aui hätte Platz gha, so hei mir üs haut chlei uf die verschieden Wirtschafte verteilt.

Nach däm kurze Haut z Loufe isches nach Utzensdorf wyter gange dert hei mir im Resturant Schloss Landshut bim Michael u der Barbara Stoll zum Nachtässe reserviert gha. Wo mir dert sy acho hei si üs mitemne grosszügige Aperoe empfangen.

Nachemne Währschafte u feine Nachtässe wo ou viu isch gsunge worde hei mir üs ufe Heiwag gmacht u e schöni u Gmütlechi Reis isch ds Änd gange.

Wiu d Dirigäntin isch y de Ferie gsy u mir nid zwo Probe hei wölle la usfaue het am Mittwoch der 2. Oktober d Silvia Wenger no mau e Singprob gleitet. Am Sunntig der 20. Oktober het ds Trachtehörli am Erndedankgottesdienst y der Chilche gsunge. Mir hei d Lieder „Bim Vernachte“, „Bärgwanderig“, „Aabeglogge“ u „Üse Vater“ vortreit.

Am 27. Oktober isch ume ds jährleche Tanzleiterträffe z Gümlige düregfüert worde.

Am 5. November het üses Ehremitglied Lydia Fahrni ihre 75-igste Geburtstag dörfe fyre. Bimne feine ds Vieri umne Glas Wy hei mir uf ihres Jubiläum agstosse. Ihre wünsche mir no einisch aues, aues Guete.

Es paar Froue hei am Donnschtig Aabe der 21. November schöni Adväntsgsteck für Tompola baschtlet.

U scho wieder isches so wyt gsy, üser aujährlechi Ungerhautigsabende sy vor der Tür gschtange.

Am Donnschtig der 28. Novämber het d Houptprob stattgunge es isch sicher no nid alles perfekt gsy aber mir hei zuefersichtlich chönne de Ungerhautigsabende entgäge luege.

Scho am erschte Aabe am Samschtig der 30. Novämber isch der Dorfsaal me aus voll gsy u ou am Donnschtig der 5. Dezämber sowie am Samschtig der 7. Dezämber hets nid minger Zuehörerinne u Zuehörer gha.

Mir hei d Bsuecher mitemne Abwächsligsricheprogramm chöne ungerhaute. Bsunders erwähne möchte iig d Asag vo üsne Lieder wo dür de Christine Reinhard, Barbara Zehnder, Tanja Hadorn, em Thomas Bühlmann u em Reto Bieri isch gmacht worde. Aune zämme e Hätzliche dank dir heit das Super gmacht.

Ou ds Theater << Es Chnächtli und es Mägdli>> es Luschtspiel vom Josef Brun wo vo üsne Theaterlüt unger der Regie vor Daniela Hadorn isch uf gfuehrt worde, het d Lüt chöne begeischtere u zwüschedüre hets d Lachmuskle vo de viele Bsuecherinne u Bsuecher ghörig strapaziert.

I möchte de Theaterlüt der Regie u em Souffleur ou ganz Hätzlich danke das si sich d Zyt gno hei näbe de ander Probe ou no Theaterprobene ds bsueche. Es isch Hüt nüme sälbverständlich dasme für nes Theater uf ds führe geeigneti Lüt i de eigete Reihe het. Uf das chöi mir stolz sy.

I möchte ou üsne dreine Leiterinne ganz Hätzlich danke de si hei e sehr-grosse Ateil am guet glinge u Erfolg vo üsne Ungerhautigsabende gha. Ja ds letscht möchte i o Öich aune es grosses Mercie für Öi mitthiuf säge de ohni Öich Aui funktioniert nid.

Wie y de Letschte Jahre isch am Mittwoch der 11. Dezämber d Alterswiehnachte ufem Programm gschtange.

Ds Programm isch wie bishär abglüfe, ou d Schüeler hei wieder mitgmacht. Natürlich het zum ds Znüni ds obligate Pastetli u o ds Chlouseseckli nid dörfe fähle.

Leider isch d Alterswiehnachte vomne dumme Unfall überschattet gsy. Füre Gschäftsbricht vor Spar+Leihkasse Gürbetal isch am Mittwoch der 18. Dezämber e Fototermin im Dorfsaal gsy.

Ds Autejahr lah Usklinge hei mir am Samschtig der 28. Dezämber bi Küenzi`s y der Hofmatt z Wattenwil Grundbach. Bime feine Nachtässe umne Richhautige Dessärbuffet isches e schöne u churzwilig Aabe gsy. Viel derzue bitreit hei üser Musikante wo mit Ihrne Örgeli für Unterhautig gsortet hei. Mercie vieu mau.

Zum Abschluss vom Vereinsjahr blibt mir nume no, Öich aune für ds mitmache u ds Mithäufe ds danke.

Merci säge möcht iig der Dirigäntin Hanny Burri sowie der scheidente Tanzleitere Vreni Wiedmer u der Vicetanzleiter Brigitta Grünenig für ihri sehr Wichtige u Kompetänti Arbeit, wo si ds ganze Jahr dür geng gmacht hei.

Äbefalls Danke möcht iig der Lieder u Theaterkommission sowie de Räch-nigsrevisore.

Ä bsundrige Dank möcht iig a miner Vorstandsmitglieder richte. Sie hei mi aus Presidänt immer tatkräftig ungerstützt.

Ou das Jahr möchte mir Tanzfroue dir Vreni u dir Brigitta ganz, ganz härzlech Merci säge für di enormi Gedud wo dir geng für üs ufbringet. Merci euich zwöine ganz härzlech!

Wie dir aui wüsst geit mi Zyt im Vorstand ds Änd nach 26 Jähriger Vorstandstätigkeit u da dervo 12 Jahr aus Presidänt ha iig mi entschlosse y ds zwöite Glied ds trätte. Mir isch y dere länge Vorstands Zyt u bsunders aus Presidänte immer ds Wohl vom Verein u vo Öich aune am Härze gläge iig ha probiert für aui mis beschte ds gäh u ha immer versuecht im Interässe vom Verein ds handle.

Mir Persönlich het das Presidänteamt vieu Sälbschtvertroue u Chraft gäh, i bi froh das y das Amt ha dörfe usführe.

I möchte mire Nachfolgerin oder mim Nachfolger aues guet u vieu Chraft für das mängisch nid eifache Amt wünsche u hoffe das dir ou mire Nachfolg die Ungerstützig entgäge bringet wie iig sy ha dörfe entgäge näh.

Für ds nöie Jahr wünsche iig Öich u Öine Familie gueti Gsundheit u mängi schöni u ds frideni Stunge mit der Trachtegruppe.

Gurzele im Jänner 2014

Öie Abträtend Präsident

Hj. Schneider

Hans-Jörg Schneider

